

周
禮
完
解

周禮完解卷二

郝敬習

天官冢宰下

醫師上士二人下士四人府二人史二人徒二十人

醫師衆醫之長醫以攻疾故次養生疾瘍等醫皆其屬

醫師掌醫之政令聚毒藥以共醫事凡邦之有疾病者死正瘍羊者造焉則使醫分而治之歲終則稽其醫事以制其食十全爲上十失一次之十失二次之十失三次之十失四爲下

藥物氣味偏故曰毒。毒攻治也。猶易云聖人以此毒天下之毒。頭瘡曰疔。身瘡曰瘍。使醫師使其屬也。分治治疾者不治瘍也。歲終稽醫事考其屬也。十全治十得十無一失也。十失四爲下。不待五五居半不治亦當得爾。無爲貴醫矣。諺云有病不治恆得中醫。故失四斯下矣。上則益祿下則損之。

食醫中士二人

凡王之飲膳百羞百醬之類皆有草木之滋劑和異法。故用醫非病始用也。

食醫掌和王之六食六飲六膳百羞百醬八珍之齊。

祭

凡食齊。眠春時。羹齊眠。夏時。醬齊眠。秋時。飲齊眠。冬時。凡和去聲。春多酸。夏多苦。秋多辛。冬多鹹。調以滑甘。凡會膳食之宜。牛宜稌。杜羊宜黍。豕宜稷。犬宜粱。鴈宜麥。魚宜菰。孤凡君子之食。恆放杜焉。

六食至八珍俱見。膳夫齊調和也。飯宜溫。眠視同。比也。春氣溫。四時用飯。常欲溫。如春時烹肉有汁。皆謂羹。四時宜熱。故視夏醬。菹醢之屬。四時宜涼。故視秋飲。水醬之屬。四時宜寒。故視冬春木味酸。夏火味苦。秋金味辛。冬水味鹹。土寄旺。四時味甘。故皆調以滑甘。爽口曰滑。會膳食之宜。謂肉與飯相宜。牛屬土。稌

宜濕水土之氣合也。羊屬火，黍爲暑，暑熱之氣合也。肉多豕，飯多稷，稷粟也。豕稷常供，故相宜。穀大而米精者，皆曰粱。犬屬戌，九月百穀皆熟，故犬宜。鴈來麥生，鴈去麥成，故鴈宜也。魚水族，蒸芟米水種，故魚宜也。放依也。

疾醫中士八人

此治九竅九藏之疾，所謂內症也。

疾醫掌養萬民之疾病。四時皆有癘疾：春時有瘡，消首；夏時有痺，養；疥疾；秋時有癰，虐；寒疾；冬時有嗽，上。貧氣疾，以五味五穀五藥養其病，以五氣五聲五色眡其

死生兩之以九竅之變。參之以九藏之動。凡民之有疾病者。分而治之。死終則各書其所以而入于醫師。

養調治也。輕曰疾。重曰病。癘疾。惡氣致疾。人身血氣調則無疾。有餘不足。乖戾生疾。曰癘。冬傷于寒。則春發于首。疳。酸削也。首疾。頭痛之疾。春傷于溫。夏發于肌表。則癢痒。而爲瘡疥之疾。夏傷于暑。伏陰內戰。秋金用事。感而成癘。爲寒顛之疾。秋傷于涼。金氣失養。冬水方生。子勝其母。上逆成嗽。爲氣壅之疾。四者皆癘疾也。五味謂酸苦甘辛鹹。五穀謂稻黍稷麥菽。五藥謂溫涼寒熱平。或謂草木蟲石穀。五氣五藏之氣。

肝木氣溫心火氣熱脾土氣和肺金氣涼腎水氣寒
五藏在內氣不可見發于聲音顏色可眡而知其死
生也肝聲角心聲徵脾聲宮肺聲商腎聲羽肝色青
心色赤脾色黃肺色白腎色黑各眡其生尅休旺如
春木色青氣溫聲角旺則吉若色白氣涼聲商則木
受金尅而凶餘以類推兩參皆詳眡之意不執曰兩
中兩曰參九竅謂陽竅七在首露見者陰竅二在下
隱伏者兩其變視其開塞也九藏謂肝心等五兼六
府之胃膀胱大腸小腸四共九動謂九藏在內不見
而氣動于脉參謂診其脉之至與不至少曰死老曰

終治不愈則書其死之故入于醫師課其工拙且以示後人

瘍醫下士八人

瘍瘡也腫潰金折之瘍所謂外症也

按食醫專主供奉故人數少疾瘍普治民間僅八人豈古人急于養而緩于藥石爲其疾病者少與

瘍醫掌腫瘍潰瘍金瘍折瘍之祝藥劑刮殺之齊凡療

瘍以五毒攻之以五氣養之以五藥療之以五味節之凡藥以酸養骨以辛養筋以鹹養脉以苦養氣以甘養肉以滑養竅凡有瘍者受其藥焉

腫瘍初發潰成也。金刀瘡折損傷祝脫落也。猶祝髮之祝。瘍痊則醫脫。凡瘍發于肌表。利于外脫。故治表之藥曰祝。鄭謂祝作注。非也。劑。剔也。殺去也。剔去其毒。亦祝意齊。藥物之和也。療。攻治也。五毒。五藥之迅利。主攻者。五氣。五穀之氣。外以祝藥劑殺攻其邪氣。內以五穀充實養其元氣也。五味。食品之味。節。借食味以輔藥力。卽酸養骨之類。酸。木味。木植立屬骨。辛。金味。金鈴束屬筋。鹹。水味。水周流屬脉。苦。火味。火熏駸屬氣。甘。土味。土敷合屬肉。滑。通利也。往來通利屬竅。所謂五味之節也。

獸醫下士四人

掌治牛馬疾瘍

按食醫以下四職有官無徒疑闕

獸醫掌療獸病療獸瘍凡療獸病灌而行之以節之以動其氣觀其所發而養之凡療獸瘍灌而劑之以發其惡然後藥之養之食之凡獸之有病者有瘍者使療之死則計其數以進退之

灌灌藥行牽使行節調也獸病難知使行動以察其氣脉也所發謂病所在養調護也發其惡使瘍毒達外乃以毒藥攻之而後養之食之以保其元氣療之

無功死則計其多寡之數以爲獸醫之進退也

酒正中士四人下士八人府二人史八人胥八人徒八十人

酒正掌酒之官古者以酒爲藥故次醫聖人惡旨酒比于鴆毒周公作酒誥丁寧至矣行禮者所不可廢故設官司之然不與膳庖饗同職而列于凌邊醢醢之數以繼五醫疾瘍之後其亦寓沈湎之戒與屬天官從水也

酒正掌酒之政令以式灋授酒材凡爲公酒者亦如之辨五齊劑之名一曰泛齊二曰醴齊三曰盎齊四曰緹

體齊五曰沈齊辨三酒之物一曰事酒二曰昔酒三曰清酒辨四飲之物一曰清二曰醫註三曰漿四曰醕池掌其厚薄之齊以共王之四飲三酒之饌及后世子之飲與其酒

式漣造酒之品式方法材米麴之屬公酒爲公事造酒如鄉飲祭祀之類齊劑同水米麴相劑和也通作粢米也酒始造曰齊旣成曰酒人用曰飲齊者米初釀成糟沛其糟成酒沛與未沛皆飲也米將化浮漲曰泛旣變成糟曰醴糟發上溢曰盎糟久凝結如絳帛曰緹猶漢官執金吾緹騎之緹糟批盡化其下清

汁曰沈此五齊皆糟未泐者酒之言酉酉父也酒以
父成事酒有事新造者如儀禮少牢卜吉宰乃命爲
酒是也昔酒昔所久造者清酒造久澄清者飲以酒
爲先故四飲旨清卽酒也醫騶也飲禘米物爲醫卽
齊之未泐者米帶汁曰漿卽醴盎也酏之言熬粥曰
酏糟之稠者卽泛齊也饌陳設也

按三酒未成卽是五齊酒齊皆可飲卽是四飲所與
漿人六飲別者此專言酒彼兼言漿也漿在酒卽是
齊酒在漿亦是飲在酒則糟卽醫酏在漿則醫酏亦
兼糟酒人四飲不得兼水涼故漿人六飲別爲一職

而吳幼清考三禮牽粢人六飲以補酒人然則粢人不爲饗肫乎

凡祭祀以醴共五齊三酒以實八尊大祭三貳中祭再貳小祭壹貳皆有酌數唯齊酒不貳皆有器量共賓客之禮酒共后之致飲于賓客之禮醫醢糟皆使其士奉之凡王之燕飲酒共其計酒正奉之凡饗士庶子饗耆老孤子皆共其酒無酌數掌酒之賜頒皆有灋以行之凡有秩酒者以書契授之酒正之出日入其成月入其要小宰聽之歲終則會唯王及后之飲酒不會以酒式誅賞

祭祀用酒有常法五齊三酒各一尊爲八齊以饗神酒以飲人齊惟正尊酒各有副貳副尊也三酒每正尊一副尊三尸酢主賓與主賓相旅酬皆用酒大祭人衆故副尊多中祭次之故再貳小祭又次之故壹貳再貳每酒三尊壹貳每酒二尊也酌數內外祭祀酬酢有定數貳尊因酌數損益惟齊酒不貳神尊尊也齊酒卽五齊齊亦是酒實五齊三酒皆有器量之使均此所謂以瀝供也凡王以禮賞勞賓客則供酒后以禮致飲于賓客則供齊醫醢糟皆齊也醫醢卽糟王用酒者酒旣成陽也后用齊者齊未泆陰也凡

賓客酒齊皆使其屬下士奉之酒正不親供王燕飲
賓客之酒計數供之則酒正親奉也士庶子王宮宿
衛者耆老致仕卿大夫孤子死王事者之子無酌數
與祭祀之飲異秩酒常賜所當予者秩常也如王制
九十者日有秩有秩必有書契據書契之數與之皆
所謂賜頒之灋也凡酒正給出之酒與造酒之材多
少之數受者日計其成月計其要以入于酒正酒正
言于小宰歲終摠會之唯王與后之飲酒不會餘皆
會也以式誅賞謂酒正以式法授造酒者如式則賞
不如式則誅

按詩書爲酒戒何諄諄也是書若出周公手必有所
以爲之防者王及后之飲酒不會豈聖人之意爲酒
式以行誅賞豈聖人之法齊必五酒必三制事有節
行禮有初猶饌有血腥燭饋熟云爾非專爲攻酒而
已

酒人奄十人女酒三十人奚三百人

奄人奄閉無陽卽寺人也酒人用奄以與婦人共事
也女酒女人善爲酒者奚女徒酒通神養血陰物幽
醞故用奄與女

按酒設二職用人至四百有五十亦可損也奄人古

有之抑不知古王者以宮禁無別奄其人用之乎爲
取諸宮刑之罪人而用之乎無宮刑之罪人而刑無
罪非先王好生之仁故刑以宮名爲其有是罪刑之
亦欲刑是罪遂役之也刑之使懲役之使新功罪相
準仁義并存意非不善周禮官人七萬有奇而用奄
止四十七人其所掌惟酒饔守桃賤役不濫用不重
任也周衰禮廢幽王寵奄寺故詩人爲賦召旻曰蝨
賊內訌昏掇靡共言奄人多也曰昔先王受命有如
召公言無元老爲宰也是書以奄人屬大宰司徒宗
伯而兵刑之司無與焉者爲慮遠矣後世所當亟講

也

酒人掌爲五齊三酒祭祀則共奉之以役世婦共賓客之禮酒飲酒而奉之凡事共酒而入于酒府凡祭祀共酒以往賓客之陳酒亦如之

爲造也世婦女官名以卿大夫妻克之卽春官之宮卿也世婦助王后祭祀則酒奄十人者供世婦在廟之役賓客禮酒王饋送賓客之酒飲酒王與羣臣燕飲之酒皆酒人親奉之凡公事供酒以其數入于酒正之府備要成也凡供祭祀之酒親往陳設饋賓客之酒亦然

按奄人供酒必親陳酒必往世婦在廟爲之役如此其勞且賤也後世奄人至于門生天子叱使公卿事不師古而流毒罔極莫此爲甚則周禮爲可師矣
漿人奄五人女漿十有五人奚百有五十人

飲有漿猶今湯茗清汁之類而酒齊亦與焉故漿人與酒人皆屬酒正酒人專供酒漿人專供飲用人至一百七十有六亦可損也

漿匠平聲人掌共王之六飲水漿醴涼醫醢入于酒府共賓客之稍禮共夫人致飲于賓客之禮清醴醫醢糟而奉之凡飲共之

六飲皆漿也。水有和與無和。溫與涼皆飲也。漿以水和米物果實之類。醴卽醴齊之連糟者。涼寒粥以雜米爲粥。淘以冷水。內則所謂濫也。醫。稀粥。醢稠粥。卽酒正四飲之二。醴之未泚者。酒人泚其汁爲酒。漿人。和其滓爲漿。六飲皆漿人。以入于酒正之府。酒正以奉于王。若賓客之飲。漿人親奉。賓在館。王使人稍餽。以飲。如今送湯茗之類。古無茗。致賓以飲。清醴。醴汁。醫醢糟醴之連糟者。皆所其稍禮與飲也。酒人供酒。漿人供醴。凡飲供之。明別于酒也。

按酒與漿皆可稱飲。而酒正兼掌酒漿。酒人漿人皆

其屬也。酒人爲酒漿，人爲漿，各有專司，飲同而供異。故漿人六，飲無酒，而酒正四，飲有漿，惟醴有糟，滓故亦屬漿人。

凌人下士二人，府二人，史二人，胥八人，徒八十人。

凌冰室，凌，揆也。冰堅成，揆。詩云：二之日鑿冰冲冲，三之日納于凌陰。凡酒漿膳羞之類，暑則味變，寒則氣凝，故暑用冰。凌人掌之，乾爲寒，爲冰是以凌人屬天官。

凌人掌冰。正歲十有二月，令斬冰，三其凌。春始治鑊，凡外內饗之膳羞，鑊焉。凡酒漿之酒醴亦如之。祭祀共冰。

鑑賓客共冰大喪共夷檠冰夏頒冰掌事秋刷

正歲夏正之歲十二月建丑也必言正歲者周十二月今之十月冰未合不可斬也三其凌所取三倍于所用備消耗也治鑑削冰成鑑冰清故名鑑春仲春四陽之月蟄蟲啓蠅蚋初生王始用冰外內饗謂王后世子及饗耆老孤子等饗鑑謂膳羞皆以冰照之酒人之酒與漿人之漿皆奉上者祭祀之冰必揀削成鑑賓客之冰供之而已不削治也大喪王喪夷檠尸盤夷平也盤大而低盛冰置牀下凡尸事言夷僵臥之狀論語謂尸居爲夷俟是也夏暑王以冰頒賜

貴臣士以下不及喪大記大夫設夷槃士併瓦槃無
冰大學云伐冰之家謂大夫也掌事凌人掌頒冰之
事秋刷秋氣清涼冰可無用故刷除之刷猶掃也冰
過夏消釋焉泥藏冰之室須掃滌

邊人奄一人女邊十人奚二十人

邊形似豆豆木邊竹邊編也編竹爲之豆實濡羞邊
實乾羞中饋之事故用奄女

邊人掌四邊之實朝昭事之邊其實麴丰蕢焚白黑形

鹽臠鮑魚鱸饋食之邊其實棗栗栗桃乾老榛實加

邊之實菱陵芡桌脯菱芡桌脯羞邊之實糗餌粉養糗

凡祭祀共其籩薦羞之實喪事及賓客之事共其籩籩羞籩爲王及后世子共其內羞凡籩事掌之

四籩卽朝事饋食加羞四朝事晨旦堂上所行禮事凡大禮用朝王祭初裸薦血腥朝事也初薦尚質其籩實炒麥米曰麴炒麻子曰蕡炒稻曰白炒黍曰黑見有司徹禮築鹽成物形曰形鹽乾肉無骨者曰臠魚之糗乾者曰鮑今楚人以米粉爲魚糝是也魚之析乾者曰鱠熟食曰饋室中饋尸也珍膳旣備佐以果實若棗若栗若桃及乾蓀蓀言老也果實乾久之通名猶內則桃諸梅諸之類鄭云乾梅也蓀似栗而

小水陸動植之品以多爲貴故謂加邊蕒蕒角芡雞
頭脯乾禽肉爲片者重言蕒芡栗脯不一之辭四物
不限數所以爲加也羞邊內羞之邊羞名主內魚肉
醢醬出庖厨者曰庶羞餅餌之類出房中者曰內羞
炒米豆爲糗搗糗爲粉乾餅爲餌言堅白如珥珥玉
瑱也養言滋濡餅也以上四邊自始筵至終事次第
品式大畧如此祭祀喪事賓客并用之凡內外祭祀
邊人供邊器與三薦之果脯內羞之餌養前三邊曰
薦者從獻之稱後一邊曰羞者以實內羞也鄭謂未
食曰薦已食曰羞然則前三邊皆不食者與王及后

世子內羞亦禮事用之

醢人奄一人女醢二十人奚四十人

醢肉醬以實豆不言豆人豆實不盡于醢也菜菹肉

醢皆醢屬中饋之事奄人掌之

醢人掌四豆之實朝事之豆其實韭菹醢膳昌本麋

醢泥菁菹鹿醢茆菹麋若醢饋食之豆其實葵菹羶

醢脾析蟻醢蟬醢神上池醢豚拍博魚醢加豆之實

芹勤菹兔醢深蒲醢落菹迫鴈醢箭菹魚醢羞豆之

實醢馳食糝散上食凡祭祀共薦羞之豆實賓客饗紀

亦如之為王及后世子共其內羞王舉則共醢六十羶

以五齊七醢七菹三醯實之賓客之禮共醢五十審凡
事共醢

四升曰豆四豆之實卽朝事饋食加羞四與籩同而
籩盛乾物豆盛濕物也韭菹切韭爲菹淹菜曰菹肉
醬曰醢醢汁曰醢以齊酒醢鹽雜漬成昌本菖蒲根
麋大鹿麋泥也熟爛之名鄭謂有骨曰麋菁蔓菁或
云韭花菹萁也麋律也脾析牛百葉麋蟬屬長曰麋
短曰蛤蜃大蛤蜃蟻子豚拍豕脊芹水菜深蒲蒲始
生未出水者箬竹萌大曰筍重言魚醢魚非一種也
菹醢共八一菹一醢相閒儀禮謂二以并是也醢稱

粥糝煎米合肉二者內羞也以上四等之豆祭祀賓客皆用皆醢人供也薦豆之實菹醢醢也羞豆之實醢糝也其內羞供醢糝王舉王盛饌五齊昌本一脾析二豭三豚拍四深蒲五也齊壘通細切爲壘七醢羸一麇二蜺三魚四兔五鴈六魚七也七菹韭一菁二茆三葵四芹五筍六筍七也三醢麋一鹿二麋三也膳人職王之饋醬百有二十醬今醢人薦半者其半醢人供也

按郊特牲云恆豆之菹水草之和氣也其醢陸產之物也加豆陸產也其醢水物也蓋菜水少而陸多肉

陸少而水多正貴常而加貴異此恆豆之菹亦用陸其醢亦用水加豆之菹亦用水醢亦用陸不盪合也大抵菜可菹者不止韭菁芹葵肉可醢者亦不止麋兔魚麋等而四豆四籩之供取諸此蓋食有常品則禮有經制費無溢額孔子所以先薄正祭器魯人無微較者以此與

醢希人奄二人女醢二十人奚四十人

醢酒之酸者卽醋也

醢人掌共五齊七菹凡醢物以共祭祀之齊菹凡醢醬匠之物賓客亦如之王舉則共齊菹醢物六十壺其後

及世子之醬齊菹賓客之禮共醯五十事凡事共醯

醯人兼掌齊菹凡齊菹之物皆用醯齊菹卽是醬故

云醯醬之物

鹽人奄二人女鹽二十人奚四十人

鹽必凍治而後可用故人數與醯醢等

鹽人掌鹽之政令以共百事之鹽祭祀共其苦古鹽散

上鹽賓客共其形鹽散鹽王之膳羞共飴鹽后及世子

亦如之凡齊事齊鹽以待戒令

鹽之政令謂凍治收受之法苦鹽同鹽成塊曰鹽形

鹽築削成物形者飴鹽鹽之甘者齊劑同調和五味

須鹽鬻以水火凍治也。如春多酸夏多苦之類皆凍治而成待戒今待取用也。

按後世鹽課幾與正賦等利盡池海。事析秋毫。有是書所未詳者。然不可謂非是書作俑也。

幕

密

人奄一人女幕十人奚二十人

巾覆物曰幕。尊彝之器飲膳之品皆以布巾之致清潔也。

按此役易辦。人數可損也。酒漿以下諸職屬膳人及內外饗亦足供矣。事各一官不亦冗乎。作者欲分任責成則百事咄嗟可辦。見小欲速之意。惟是物渺而

切王躬各有司存。借元宰提挈。則羣小不敢越職。壞常。斯亦美意耳。

冪人掌共巾冪。祭祀以疏布巾。冪八尊。以畫布巾。冪六彝。凡王巾皆黼。

巾以布爲之。疏布。麤布尚朴也。八尊。以盛五齊三酒。祭天地不裸。無鬱鬯。止齊酒耳。貴質。故巾不畫。宗廟畫飾。故畫巾。六彝。皆尊屬。盛鬱鬯者也。詳春官司尊彝職。凡王膳羞豆俎皆巾。白黑曰黼。其文斧。周人以武革命。斧象之。夏以揖讓。尚文。用黻。青黑曰黻。其文兩已相背。

宮人中士四人下士八人府二人史四人胥八人徒八十人

掌王寢之蠲除自此下至掌次四職皆王居處之司故次飲食北辰帝宮故屬天官

按此人數亦可省也糞除井閤勞賤諸役不以奄寺罪隸而以中士亦未允

宮人掌王之六寢之脩為其井閤燕除其不蠲去其惡臭共王之沐浴凡寢中之事埽除執燭共鑪炭凡勞事四方之舍事亦如之

王寢有六陰數之極也脩潔除也井以取水為洗滌

也。區築塹爲坑受穢。以時蓄洩也。不蠲不潔也。凡勞事。謂一切勞辱之事。四方之舍。謂王行宮。

掌舍。下士四人。府二人。史四人。徒四十人。

舍。謂行宮。

掌舍。掌王之會同之舍。設桯。

避桓

互

再重。設車宮。轅門。

爲壇壝。

偉

宮。棘門。爲帷宮。設旌門。無宮。則共人門。凡舍

事。則掌之。

諸侯時見王曰會。殷見曰同。皆爲壇。國外與諸侯盟。詳覲禮舍。王所舍。遶舍。交木爲行馬。以禦衆曰桯。桓。再重。兩行也。王在軍。則列車爲宮。其門曰轅門。車中。

直木曰輅。卽輅也。以列車得名。鄭謂險阻之地仰其車輅爲門也。築土平治曰壇。累土爲圜曰墠。卽會同及祭祀之宮。棘戟通列棘爲門也。王暫止于外有所展習。張帷爲宮。則設旌旗爲門也。王在道路邂逅小憇無宮。則使甲士護其前。以人爲門也。

幕人下士一人。府二人。史二人。徒四十人。

幕帷帳。凡王所舍具帷帳。書所謂綴衣也。

幕人掌帷幕幄帟。亦綴之事。凡朝覲會同軍旅田役祭祀共其帷幕幄帟。綴大喪共其帷幕帟。綴三公及卿大夫之喪共其帟。

帳四週曰帷。在上曰幕。帷幕在外，大而不屬。幄在幕內，連合象屋也。帟又在幄內，坐上承塵也。大喪帷幕，棺柩賓客用之。嗣王襲經序，東亦有帷。綬組綬以繫帷也。皆幕人供之，以授掌次。張之。

掌次下士四人，府四人，史二人，徒八十人。

次謂舍中。王坐臥休息之處，設几案衾褥之類。然既有掌舍幕人，此百人者亦可損也。

掌次掌王次之灋，以待張事。王大旅上帝，則張氈案，設皇邸朝。潮日祀五帝，則張大次小次，設重帟重案。合諸侯亦如之。師田則張幕，設重帟重案。諸侯朝覲會同，則

張大次小次師田則張幕設案。孤卿有邦事則張幕設案。凡喪王則張帟三重。諸侯再重。孤卿大夫不重。凡祭祀張其旅幕。張尸次。射則張棚次。掌凡邦之張事。

次瀼謂大次小次等法待猶聽也。聽治其僚役張設帷幕之事。旅陳也。衆也。大旅盛祭羣神之名。上帝謂昊天上帝。冬至圜丘之祭。時寒故張氈案。王服大裘卽此時也。案牀几也。皇邸天子舍次之稱。皇大也。邸抵止也。郊天禮盛故稱皇邸。鄭謂染羽色象鳳凰爲屏風。鑿也。朝日謂春分拜日於東門外。祀五帝謂四時迎氣于各郊。祀五方天帝。大次王臨御處。小次王

退息處孤卿天子之少師少傅少保爲三孤自六卿
加命者也有邦事謂有王事則掌次爲張設幕案也
凡喪王張帟三重謂先王之柩嗣王襲經東序之次
皆用帟其制小諸侯以下謂奔王喪者士以下無張
檀弓云君於士有賜帟賜乃有也旅幕助祭羣臣所
居之次尸次祭祀時尸在堂在室之次射謂天子與
諸侯大射于郊賓射于朝皆六耦燕射于寢三耦皆
有次弓矢在次內儀禮云遂命三耦取弓矢于次是
也

大府下大夫二人上士四人下士八人府四人史八人

賈十有六人胥八人徒八十人

大府爲王治藏之長。摠其入而分之。諸府者也。其職重。故用下大夫。自此至掌皮十一職。皆財貨之司。而大府與司會爲出入之長。王飲食居處外財用最急。君心荒于侈。與羣小因緣爲姦。亦惟財爲甚。故冢宰兼領之後。世宰相領度支。儒者非之。不知後世之失。在別設宰相。不在領度支也。說詳天官。用賈十六人以九貢內多方物。必識物價者。驗別之。

大府掌九貢九賦九功之貳。以受其貨賄之入。頒其貨于受藏之府。頒其賄于受用之府。凡官府都鄙之吏及

執事者受財用焉。凡頒財以式漙授之。關市之賦以待王之膳服。邦中之賦以待賓客。四郊之賦以待稍秣。未家削之賦以待匪頒。邦甸之賦以待工事。邦縣之賦以待幣帛。邦都之賦以待祭祀。山澤之賦以待喪紀。幣餘之賦以待賜予。凡邦國之貢以待弔用。凡萬民之貢以充府庫。凡式貢之餘財以共玩好之用。凡邦之賦用取具焉。歲終則以貨賄之入出會之。

九貢九賦。見大宰職。九功卽所謂九職。貳副也。大宰掌之。大府副之。凡九州萬民貢賦一切輸于大府。以摠其入。大府分授于內外諸府。受而藏之用之也。受

藏之府卽王府內府等受用之府卽外府職歲等貨
寶玉之類故言藏賄粟帛之類故言用官府王朝三
百六十官屬都鄙之吏三等采地羣臣凡有事須財
用者皆于大府受式灋焉頒財謂大府揔其入量每
歲各司經用之數分置各府以大宰九賦九式之法
頒之關市之賦取于商旅百工者以待王膳羞衣服
之用邦中之賦王城內外附近田稅以待賓客爲其
取用便也四郊之賦王城百里外田稅以待芻秣之
用謂之稍者稍給之也蓋秸藁薪芻之類近輸便也
家削謂三百里大夫采地之賦以待大賞匪頒之用

邦縣四百里卿采地之賦以待幣帛將享邦都五百里公采地之賦以待祭祀鬼神此三者以賦之貴賤爲用之輕重也山澤之賦虞衡之征以待喪紀棺槨荼蜚之類給焉幣餘之賦卽九職嬪婦園囿臣妾閒民之屬出者非正賦以供王之賜予邦國謂諸侯之九貢田賦外所貢各方物以待喪荒助給之用民間之貢以備內外諸府庫正賦不足之用九式九貢經用有餘則以供王玩好苑囿器用之類凡邦之賦用摠言內外諸費取具謂皆于大府取備也

按天子富有四海其飲食衣服粟米布縷惟正之供

今以王之膳服取諸關市。夫關市君子所謂攘雞之
征也。是書以爲九賦第一。則其流毒將有不可勝言
者。玩好喪志。賢君恭儉。屏之惟恐不遠。元老慮國。杜
之惟恐不嚴。況導其奢。留其餘財以供之。豈周公之
法與。吳澄氏寧芟其文。終不信其非周公之書。曾是
周公之書而受儒者之變與。

王府上士二人。中士四人。府二人。史二人。工八人。賁八
人。胥四人。徒四十有八人。

此大府所謂受藏之府也。受大府所頒餘財。專以供
王玩好。不在外用之數。玩好貴王。故稱王府。工攻玉。

賈辨王乾爲王故屬天官

王府掌王之金玉玩好兵器凡良貨賄之藏共王之服
玉佩玉珠玉王齊齊則共食王大喪共含王復衣裳角
枕角栖掌王之燕衣服衽席牀第凡褻器者合諸侯則
共珠槃玉敦對凡王之獻金玉兵器文織良貨賄之物
受而藏之凡王好去聲賜共其貨賄

金玉玩好皆大府餘財所置兵如弓劔之類精良者
也服王冕旒弁璫之屬佩玉珩璜琚瑀之屬珠謂佩
玉雜珠王將祭而齊則變食日三舉器用玉復衣裳
始死招魂之衣裳不供于司服于王府者死事屬北

方從嚴凝之氣也。角枕。角爲枕。以斂尸。角枌。角爲匕。挑飯奉含者。燕衣服。褻衣也。衽席。臥席。第。簀同。亦席也。牀第。牀上設第。褻器。清器。虎子之屬。合諸侯大會諸侯也。珠槃王敦享禮之器。以珠玉飾之。明堂位云。有虞氏之兩敦。特牲少牢盛黍稷皆用敦。凡王所受獻金玉等物。宜藏內府。王取自用。則收之玉府。不與內府待外用者同藏也。文織。帛之織文彩者。

按天子以天下爲富。不私藏財。況金玉玩好。不可衣食。置官屬七十人聚而守之。豈賢君抵璧投珠之意。鄭解食玉。謂王齋則食玉屑。此承漢主服食之陋。謂

珠槃王敦爲王者與諸侯歃血之用夫歃血豈先王之禮家語云臣與於君曰獻鄭謂王獻諸侯之金玉引春秋齊侯來獻戎捷爲徵緣未知春秋耳

內府中士二人府一人史二人徒十人

此亦受藏之府待外大用與王府供玩好者異

內府掌受九貢九賦九功之貨賄良兵良器以待邦之大用凡四方之幣獻之金玉齒革兵器凡良貨賄入焉凡適四方使者其其所受之物而奉之凡王及冢宰之好賜予則共之

九貢九賦九功之貨賄皆大府頒之內府受而藏之

良兵良器四方所貢或冬官百工所造四方諸侯朝聘所獻幣象齒犀虎等皮革皆由大府頒來內府入之王使適四方有齎幣往賜則內府供使者所應受之物奉以與之冢宰貳王凡王及冢宰之好賜予卽大宰職云凡邦之小治冢宰聽之待四方之賓客之小治是也

外府中士二人府一人史二人徒十人

此大府所謂受用之府也主泉布入出待邦之百用曰外府

外府掌邦布之入出以共百物而待邦之用凡有澆者

共王及后世子之衣服之用。凡祭祀賓客喪紀會同軍旅共其財用之幣。齎賜予之財用。凡邦之小用皆受焉。歲終則會。唯王及后之服不會。

布卽泉與錢通。古者謂錢爲泉。言流不竭也。又謂之布。言布散也。其百物以泉致百物也。凡有限數取用之法者。卽下文邦之小用也。幣齎路費也。軍旅以上財用大者。各有經制。外府但供其齎用小費耳。賜予王恩賜。

司會。古外反。中大夫二人。下大夫四人。上士八人。中士十有六人。府四人。史八人。胥五人。徒五十人。

會算計也。司會主計天下財賦經用出入之數。爵中大夫重其任也。是書詳于課吏而吏事先財用。

司會掌邦之六典八灋八則之貳以逆邦國都鄙官府之治。以九貢之灋致邦國之財用。以九賦之灋令田野之財用。以九功之灋令民職之財用。以九式之灋均節邦之財用。掌國之官府郊野縣都之百物財用。凡在書契版圖者之貳以逆羣吏之治。而聽其會計以參互攷日成。以月要攷月成。以歲會攷歲成。以周知四國之治。以詔王及冢宰廢置。

六典以治邦國。八法以治官府。八則以治都鄙。皆大

宰掌其正小宰掌其貳司會又掌其貳以專考財用
入出課百官之能否爲廢置也逆謂以成法按之九
貢九賦九功九式皆掌之大宰九功卽九職之功九
貢出于諸侯司會如法致之九賦除邦中之賦餘皆
田野賦多出田野據多者言之九功辨民職而後賦
定故云民職之財用非九職別爲一賦如鄭說也貢
自諸侯曰致賦徵于民曰令貢賦功式四者皆大宰
治財用之法其典法則三者皆大宰治百官之法司
會皆得掌之以其法考百官之百物財用朝廷曰官
府國外百里曰郊二百里曰甸三百里曰稍皆謂之

野四百里曰縣五百里曰都百物卽九貢九賦內之
百物皆財用也書契文券也記載曰書合驗曰契戶
籍曰版地形曰圖貳謂副大宰參參以彼此互互其
同異如今人總撒較勘皆會計之法日成每日之數
合日成月合月成歲月數曰要歲數曰會畧以致詳
分以求合久近異同不可隱而吏治情僞見乃告于
冢宰廢置之

司書上士二人中士四人府二人史四人徒八人
主會計之簿書司書掌之司會執以考之

司書掌邦之六典八灋八則九職九正九事邦中之版

土地之圖以周知入出百物以敘其財受其幣使入于職幣凡上之用財用必攷于司會三歲則大計羣吏之治以知民之財器械之數以知田野夫家六畜之數以知山林川澤之數以逆羣吏之徵令凡稅斂掌事者受漚焉及事成則入要貳焉凡邦治攷焉

九正卽九貢九賦之正供九事猶九功卽九職版戶籍也與土地之圖皆司書掌之知每歲入數按入以知出數百物工作所用材物竹木金錫之類以敘其所用而稽其餘也幣謂幣餘支用有餘司會受之以付職幣待別用也上之用財謂王以下及冢宰六卿

用財皆攷核于司會而司書書之以待考也羣吏之徵令謂凡徵收財賦如地官之閭師旅師等按數考其虧盈知其能否也凡收稅主者受數于司書收畢以歲入總要送于司會以副數送于司書冢宰掌邦治考羣吏司書皆與焉以吏治莫先于財用也

職內上士二人中士四人府四人史四人徒二十人

主財賦之入數

職內掌邦之賦入辨其財用之物而執其總以貳官府都鄙之財入之數以逆邦國之賦用凡受財者受其貳令而書之及會以逆職歲與官府財用之出而敘其財

以待邦之移用

辨其財用之物。謂如貢賦等入。各分別其所用。官府都鄙之財。卽物貳其數者。大府有正數。職內有副數。以逆考邦國之用也。蓋凡貢賦入大府者。先由職內。而大府總受。以頒于諸府。大府頒財下其令于諸府。謂正令以其分受之數下于職內。謂貳令。職內受而書記歲終會計。以所記入數。迎合職歲與官府出數。敘一歲有餘之財。以轉給邦國之他用也。

職歲上士四人。中士八人。府四人。史八人。徒二十人。主每歲用出之數。

職歲掌邦之賦出以貳官府都鄙之財出賜之數以待會計而攷之凡官府都鄙羣吏之出財用受式灋于職歲凡上之賜予以敘與職幣授之及會以式灋贊逆會凡百官用財式灋歲有常數皆職歲掌之必于職歲受式灋而後得支取凡上之賜予職歲開列一歲應與之數以與職幣職幣掌之見下

職幣上士二人中士四人府二人史四人賈四人胥二人徒二十人

掌收費用餘財變賣置幣以待王賞賜及小用賈四人辨物定值也

職幣掌式灋以斂官府都鄙與凡用邦財者之幣振掌
事者之餘財皆辨其物而奠其錄以書揭之以詔上之
小用賜予歲終則會其出凡邦之會事以式灋贊之
掌百官每歲費用常制以斂官府諸用財者之餘幣
二句釋職幣之名振掌事者下職幣之事振收也凡
當事者用財有餘皆職幣收之分別所餘之物奠定
其錄書揭其數以告于王小用賜予卽前職歲所授
之敘

按大府以下九職皆財用之司一泉一布必互相鉤
考關通會合而後得用其用也又設之官以錄其美

筭幾無遺策矣。夫好利者，人之情。上之綜覈愈詳，則下之侵漁愈巧。役冗而竇多，筭之所得者，不償其衆之所費。故與其詳于法也，寧詳于人。得人則法不勞，而理不得人，徒恃法，法卽弊也。得人而泥法，人又烏得展其用哉？

司裘中士二人，下士四人，府二人，史四人，徒四十人。司裘掌皮之長，皮事莫重于裘，故以名。掌皮則其屬也。古者幣重皮故，繫財貨之後，又裘爲祀天之服，故屬天官。

司裘掌爲大裘以共王祀天之服。中秋獻良裘，王乃行。

羽物季秋獻功裘以待頒賜王大射則共虎侯熊侯豹
侯設其鵠諸侯則共熊侯豹侯卿大夫則共麋侯皆設
其鵠大喪廞僅裘飾皮車凡邦之皮事掌之歲終則會
唯王之裘與其皮事不會

大裘裘不用表貴質也冬至祀天之服玉藻云大裘
不裼是也中秋夏正八月鳥獸毛毳美澤故獻良善
之裘于王百鳥新成秋始殺故王頒賜羽物于羣臣
功裘工人所製供王頒賜者王與諸侯卿大夫射曰
大射侯待也置物于彼待射也形似猴曰侯大射用
皮侯布中棲皮爲鵠王之侯虎皮諸侯熊皮王之卿

大夫以下豹皮皆取服猛之義諸侯自射能皮其卿大夫以下皆用麋皮鵠大鳥侯中爲鵠鵠中爲正正用畫卽鄉射記云天子白質諸侯赤質也廡言壇藏也死者生時所著裘壇藏之皮車以皮鞅車卽革輅送葬用革車脩飾其皮使新也鄭註廡作輿以裘爲偶衣車爲明器恐非

按大射禮侯之崇廣以射之遠近爲差大侯九十弓天子之侯道參侯七十弓諸侯之侯道千侯五十弓大夫以下之侯道五十弓之侯卽麋侯又鄉射記云鄉侯道五十弓二寸以爲侯中侯中卽鵠二五爲十

尺則是五十弓之侯鵠方一丈也又考工記云侯之廣與崇方三分其廣而鵠居一則是五十弓之侯高廣凡三丈以此推之諸侯之侯高廣三丈四尺天子之侯高廣二丈八尺三侯二侯皆自北而南同道連設各射其鵠詳大射禮而鄉射記又云天子熊侯白質諸侯麋侯赤質大夫士布侯畫虎豹鹿豕與此文異

掌皮下士四人府二人史四人徒四十人

說見上

掌皮掌秋斂皮冬斂革春獻之遂以式灋頒皮革于百

工共其毳脫毛為氈以待邦事歲終則會其財齎

毛存曰皮為獸毛至秋解澤故秋斂司裘中秋獻良裘以此去毛曰革操治經時至冬乃斂皮革皆俟乾至春乃獻也式灋每歲合用之式造作之灋百工用皮者冬官韋氏函人之類毳細毛邦事如掌次張氈案之類財齎猶財幣皮革可齎持曰齎與資通卽財也

內宰下大夫二人上士四人中士八人府四人史八人胥八人徒八十人

此宮中官之長故亦稱宰以下皆宮壺之司

內宰掌書版圖之灋以治王內之政令均其稍食分其
人民以居之以陰禮教六宮以陰禮教九嬪以婦職之
灋教九御使各有屬以作二事正其服禁其奇基裘邪
展其功緒大祭祀后祿獻則贊瑤爵亦如之正后之服
位而詔其禮樂之儀贊九嬪之禮事

書記也記宮內百職名氏于版畫宮寢內外廬舍爲
圖執版以稽所守之職按圖以知所居之地皆政令
也稍食廩祿也人民凡在內之官吏家衆皆是六宮
卽六寢王有路寢燕寢小寢后亦如之王曰寢后曰
宮皆后主之六者陰數之極故以稱宮非必王有六

寢后又有六宮象王如鄭說也。陰教以女德教六宮
爲嬪御者。陰禮女親。九嬪女官之長。教諸宮嬪進御
之禮者。其屬卽九御也。內宰以陰禮教九嬪。使以婦
職教九御。嬪各有御爲屬從也。二事謂絲枲。大宰九
職。嬪婦治絲枲。正其服。服有常飾。勿爲靡麗也。奇袤
治容善媚之類。功緒卽女工。大祭謂宗廟祫禘。裸獻
謂始祭尸入室。王酌圭瓚獻尸。后酌璋瓚從獻。則內
宰贊后。瑤次王。王爵玉。后爵瑤。自裸後朝事至卒食。
王獻尸。后皆以瑤爵從。內宰贊如初。正服如褱衣。綸
狄之類。正位如房中。戶內及阼。后所立之位。禮樂之

儀謂凡行禮之節與樂聲容相應九嬪贊后薦王盥薦徹豆邊內宰亦助九嬪蓋內宰本教九嬪者也

凡賓客之裸獻瑤爵皆贊致后之賓客之禮凡喪事佐后使治外內命婦正其服位凡建國佐后立市設其次置其敘正其肆陳其貨賄出其度量淳制祭之以陰禮賓客謂諸侯朝見王燕饗裸獻后以瑤爵從內宰贊之王致賓客牢醴后亦有致禮內宰爲致之國有大喪內外羣臣服位各有等其羣臣婦則內宰佐后治之凡營建國邑前朝後市王立朝后立市象陰陽也次叙謂市居比連如地官司市司次介次皆有官屬

分洫肆行列出其度量齊民俗也。淳作純。幅廣曰純。匹長曰制。古布帛廣四咫。八寸曰咫。是三尺二寸也。制長丈八尺。市成則祭以陰禮。祭社神如俗謝土然。○按天地陰陽雖有相承之義。其實一天一陽耳。議禮者執配合之說。謂宮內宜與大廷比。王有六寢。后有六宮。王有三公九卿二十七大夫。后有三夫人九嬪二十七世婦。王饗賓客。后亦饗賓客。王治羣臣。后亦治命婦。則是壺外之事。后亦預矣。至于營建。何有于婦人。朝市雖分南北。市之器雜甚于朝。王立朝。夫人立市。于陰陽之義。殊不相似。彼其市次貨賄度量。

何預女主事而皆勞內宰爲陳設祭不請王而后以陰禮自主是何禮與詩云無非無儀女之貞也禮家動稱陰配陽小則牝雞鳴晨家道之索大則誨淫生戎繆侯所以見殺呂雉武壘所以亡人國家也嗚呼可不戒哉可不戒哉

中春詔后帥外內命婦始蠶于北郊以爲祭服歲終則會內人之稍食稽其功事佐后而受獻功者比其小大與其蠶良而賞罰之會內宮之財用正歲均其稍食施其功事句憲禁令于王之北宮而糾其守上春詔王后帥六宮之人而生穰同稔六之種而獻之于王

北郊陰地王耕南郊后蠶北郊歲終獻功九御之屬
獻絲枲二事之功布帛有大小絲縷有麤良因以爲
賞罰正歲夏正月均稍食調度一歲之廩祥施其功
事施一歲所當爲之職業憲猶示也北宮卽後宮示
禁令于後宮約束守衛之人也上春猶早春農事責
早五穀先種後熟曰種後種先熟曰稔生其種以獻
于王勸耕籍也鄭以爲傳類蕃孳之祥鑿也

內小臣奄上士四人史二人徒八人

內小臣掌王后之使令奄上士奄人爲上士卽小臣
稱內以別于夏官小臣也

內小臣掌王后之命。正其服位。后出入則前驅。若有祭祀賓客喪紀則擯。詔后之禮事。相九嬪之禮事。正內人之禮事。徹后之俎。后有好事去聲于四方則使往。有好令於卿大夫則亦如之。掌王之陰事。陰令。

命使令。服后之命服。位中宮朝位。祭賓喪三事后在。則內小臣爲擯。傳辭詔后行禮。九嬪隨后則相之。諸內人從行則正之。凡后受尸酢飲于房中有俎則內小臣徹之。好事謂王后脩問四方親戚。好令問勞卿大夫陰事幸御等事。陰令召見嬪御等令。

閭人王宮每門四人。園游亦如之。

閤昏也。門昏則閉。臯門以內皆謂王宮。天子中門有五。苑囿游觀之處不在宮中。其門亦掌之。閤人故別言之。

閤人掌守王宮之中門之禁。喪服凶器不入宮。潛服賊器不入宮。奇服怪民不入宮。凡內人公器賓客無帥則幾其出入以時啓閉。凡外內命夫命婦出入則爲之闢。掌埽門庭大祭祀喪紀之事。設門燎蹕宮門廟門。凡賓客亦如之。

王五門自外而內。臯庫雉應路皆南向。當國中謂中門。鄭謂爲雉門居五門中。然則云每門四人者豈一

雉門與凶器送死明器之屬潛服潛形微服賊器盜賊之任器奇服非常見之服怪民踪跡可怪之人如此者皆禁不得入王宮內人婦人公器公家什物賓客遠方之使三者出入必有主者帥之無則幾察門夜漏盡則啓晝漏盡則閉若外內命夫命婦有急出入雖當其閉爲之闢也門庭當門前地燎地燭束葦灌蟄焚之以照昏也蹕止行人廟在中門外故閤者蹕之凡王燕賓客于寢饗于廟亦爲設門燎蹕

寺人王之正內五人

寺侍也正內正寢也凡內侍通稱寺人不必定奄春

秋傳晉寺人披自稱刑臣彼誠奄寺人也凡職用奄必著之此不言奄言閹寺有奄則用無奄則選士人端謹者充之故不定言奄總之周禮用奄止三十九人耳

寺人掌王之內人及女宮之戒令相道其出入之事而糾之若有喪紀賓客祭祀之事則帥女宮而致於有司佐世婦治禮事掌內人之禁令凡內人弔臨于外則帥而往立于其前而詔相之

王內人謂王宮中婦人女宮猶言宮女婦人之無夫而給事宮中者卽內人之屬使役之女鄭謂爲宮刑

之女宮中婦非必盡罪人也。有司謂世婦掌喪紀賓祭之事。用女宮爲役。故寺人帥而致之。九嬪行禮則內宰內小臣相之。世婦行禮則寺人佐之。內人之禁令。謂防範內人弔臨。謂女宮從世婦出弔臨喪。詔相謂詔相內人。

內豎倍寺人之數

內豎出入王宮。通內外使令。豎童未冠。故得出入王宮。非定奄也。奄則不必豎。倍寺人數十人耳。

內豎掌內外之通令。凡小事。若有祭祀賓客喪紀之事。則爲內人蹕。王后之喪。遷于宮中。則前蹕及葬。執褻器。

以從遣車

內謂宮中、外謂外廷。王在宮，而外廷有小事，復則內豎傳之。大事未可以豎傳也。王后喪殯七月而葬，遷柩朝廟，內豎前蹕止行人，棄器振飾頽沐之器，遣車送葬之車，載死者衣冠。

按內小臣下四職處奄寺最善。內小臣閹寺內豎之長，爵止上士，蓋奄宦之極貴，無爲大夫者矣。其官四人，其史徒止十人，其閹人每門不過四人，其奉王內不過五人，其內豎通令不過十人，省之至也。小臣用奄，閹寺內豎不定奄，凡成人端謹與童子忠慎者皆

可克數誠不欲多近刑人以叢姦亦不欲刑無罪之人用之以傷仁也故五官之屬用奄止四十七人後世奄寺出入後宮動以萬計爵公卿上權侔人主漢唐之亡由此則是書之法百世可師也

九嬪

九嬪掌教九御之官蓋取諸舊宮人齒長而賢者克之曰嬪言其賢可賓也九陽數之極天子數用九後儒穿鑿爲九嬪二十七世婦八十一御妻鄭玄解禮極其附會爲進御之法半月一週導侈誨淫大爲禮經之蠹而腐儒崇信可怪也設使古嬪婦御妻果有

此數旣言九嬪世婦女御何獨不舉其數乎后則尊
矣所謂三夫人者不可與九嬪并列乎九嬪之屬旣
云以時御于王所世婦女御豈獨不言御乎故知進
御者九嬪之屬非九嬪也職事了然九嬪與世婦女
御皆官職不言數取具官耳未限有無多寡也

九嬪掌婦學之灋以教九御婦德婦言婦容婦功各帥
其屬而以時御敘于王所凡祭祀贊王盥資贊后薦徹
豆籩若有賓客則從后大喪帥敘哭者亦如之

九嬪教九御者婦學卽德言容功婦以貞順爲德以
靜默爲言以端莊爲容以絲枲爲功各帥其屬九嬪

各有屬以時昏進晨退也御侍也敘不陵越皆九嬪
教也王所王寢所玉盥玉敦簠簋之類以盛黍稷后
薦之九嬪贊之豆盛菹醢籩盛脯果亦后薦之九嬪
代徹王大饗賓客后在九嬪從大喪后在亦帥內人
敘哭以從

世婦

世婦勲舊世臣婦與春官世婦同秩此則居王宮內
蓋冢宰以下六十三職卿大夫之妻官舍姓名皆在
內宰版圖故屬天官鄭据昏義二十七世婦之說以
爲王進御之數非也

世婦掌祭祀賓客喪紀之事帥女宮而濯摝爲盥盛及祭之日蒞陳女宮之具凡內羞之物掌臨弔于卿大夫之喪

祭賓喪事謂中饋之事助王后之役摝拭也盥盛猶粢盛五穀曰粢在器曰盥女宮之具內羞糗餌粉養之類弔臨卿大夫之喪王后使之往弔鄭云王使非也此卿大夫喪在內者內世婦弔之居內便也春官世婦掌內事達于外者外卿大夫之喪外世婦弔之居外便也

女御

御猶侍也。女御宮中女侍者，卽所謂女宮也。其職尤卑。

女御掌御敘于王之燕寢，以歲時獻功事。凡祭祀贊世婦。大喪掌沐浴。后之喪持髮從世婦而弔于卿大夫之喪。

掌御敘謂九御當夕者。女御以敘奉之于王之燕寢，不在后宮之夕也。功事，女功之事。掌沐浴供湯物也。髮形如扇，持髮以蔽軀。世婦以王后命出弔，則使女御從或者以爲王之御妻，豈有恩幸之女從世婦出弔供湯沐持柩髮者，爲女宮之類甚明。

按九嬪世婦女御本皆宮中有司非如昏義所云王后夫人以下衆妾之謂如以宮嬪私人齒于官府豈朝廷之禮嬖妾不以列庶官法至善也不言其數以少爲貴取備官耳古之王者宮禁清約內無怨女人情攸宜豈如後世宣淫敗度後宮千人幽恚而傷天和者與惟執政大臣得關其柄故無濫進溢額之弊女祝四人葵八人

女祝婦人善媚鬼神者供六宮之禱祀

按禱祀事本不經愚婦易惑尤爲厲階後世巫蠱之害誤于此不可用也

女祝掌王后之內祭祀凡內禱祠之事掌以時招梗禴禳之事以除疾殃

招延請梗捍禦禴求福禳卻災

女史八人葵十有六人

女史婦人曉文藝者亦以舊宮嬪及外婦充之

女史掌王后之禮職掌內治之貳以詔后治內政逆內宮書內令凡后之事以禮從

禮職謂諸禮儀后所當主者凡內治掌之內宰女史書而貳之以詔后逆內宮據其貳以考六宮也內令王后之令內史書以宣布于宮中以禮從謂執舊典

從后使無違錯也

典婦功中士二人下士四人府二人史四人工四人賈
四人徒二十人

典婦功主內宮婦人絲枲之功工涑治之工賈辨絲
枲貴賤者

典婦功掌婦式之灋以授嬪婦及內人女功之事齊凡
授嬪婦功及秋獻功辨其苦良比其小大而賈之物書
而揭之以共王及后之用頒之于內府

婦式之灋女功之成法嬪婦九嬪世婦及所屬女御
輩各有女功之事者齊資同布帛皆資財也始授功

絲麻有美惡辨而授之既成獻帛帛有大小比而收之各書記其物以待上用頒之內府

典絲下士二人府二人史二人賈四人徒十有二人主爲帛者

典絲掌絲入而辨其物以其賈楊之掌其藏與其出以待興功之時頒絲于外內工皆以物授之凡上之賜予亦如之及獻功則受良功而藏之辨其物而書其數以待有司之政令上之賜予凡祭祀共黼畫組就之物喪紀共其絲纁組文之物凡飾邦器者受文織絲組焉歲終則各以其物會之

絲入九職所貢絲辨其物辨麤細也賈值也揭書記也他財貨出入必分官掌之惟絲藏出皆由典絲興功織造也頒絲織造以初入所揭物賈授之別精粗也獻功工人成縑帛來獻絲功精曰良祭祀之物謂衣裳冠冕之類白黑曰黼采色曰畫組綬也成采曰就喪紀之物衣衾巾屨之類絲線也縵綿也邦器帷幄旌旗之類

典臬下士二人府二人史二人徒二十人

主爲布

典臬掌布總縷紵之麻草之物以待時頒功而授齋及

獻功受苦功以其賈褐而藏之以待時頒頒衣服授之
賜予亦如之歲終則各以其物會之

總朝服布十五升去其半六百縷也布細而疏曰紵
麻枲麻草葛類齊資同卽麻縷布功麤與帛異曰苦
功

內司服奄一人女御二人奚八人

掌宮中裁縫之事女御見前

內司服掌王后之六服褱

厚

衣揄狄闕

屈

狄鞠衣展衣

緣象

衣素沙辨外內命婦之服鞠衣展衣緣衣素沙凡

祭祀賓客共后之衣服及九嬪世婦凡命婦共其衣服

共喪衰亦如之后之喪共其衣服凡內具之物

天子衮衣九章九爲陽數之極后褱衣有六等六爲
陰數之極一褱衣二揄狄三闕狄四鞠衣五展衣六
緣衣褱煒通華采也鄭引爾雅作釐雉也刻畫繪爲
五色素雉綴于玄衣之上也天子五冕一衮二鷩鷩
卽雉王后降一等故衣雉飛揚曰揄狄翟同卽雉詩
云玼兮玼兮其之翟也闕狄喪大記作屈狄栖伏曰
屈褱狄有揄屈猶衮龍有升降也鞠鞠通黃衣也展
白衣也詩云瑤兮瑤兮其之展也瑤白貌緣鄭作襟
黑衣也素紗以無文細縠爲單衣籠六衣上卽士昏

禮謂明景衣。詩謂衣錦駸衣。衣錦尚絅是也。外命婦卿大夫妻在外者。內命婦居王宮。在內宰版籍者。命婦之服無褱狄。自鞠衣以下凡三等。鄭謂二王後與上公夫人褱衣。侯伯夫人揄狄。子男夫人闕狄。孤妻鞠衣。卿大夫妻展衣。士妻祿衣。據春官六冕推之。證以雜記當然耳。后所與唯祭祀賓客。九嬪世婦皆從后者。凡命婦謂內外命婦。卿大夫妻有事從后者。司服皆供其禮服。大喪之衰服亦供之。后喪其衣服謂襲斂之衣服。內具之物。謂紛帨盤衮之類。從葬者按六服之制。不可詳考。鄭據爾雅。謂揄作搖。刻畫五

色青雉綴于青衣上刻雉不畫曰闕綴于赤衣上月
令三月薦鞠衣于上帝鄭謂三月桑生鞠黃桑色雜
記云下大夫禮衣卽展衣禮袒同單也鄭以展衣爲
見賓客之服王后從王見賓客被無文單白衣何取
平緣衣據文當是緣飾之衣猶今衣之有邊襴者異
于上五衣色純者耳鄭謂爲燕居與進御之服引大
喪記士用稅衣稅作祿爲緣字之誤疏義謂祿黑色
爲水水生金爲展衣白色鞠衣土色闕狄火色揄狄
木色禮衣玄天色皆以臆鑿解未可據鄭謂素沙爲
六衣之裏而雜記云復用素沙豈以衣裏復乎詩云

嗟兮嗟兮其之展也蒙彼絺繡是袼袼也謂展衣上加絺繡蒙之卽素沙也薄繒曰絺不但葛有絺書云絺繡葛豈可繡展與襢同單衣豈有裏又謂禕衣祀先王揄狄祀先公闕狄羣小祀因春官司服六冕鑿解皆難据三狄盡飾三衣亦必有物而今皆不可考縫人奄二人女御八人女工八十人奚三十人掌縫王及后衣服

縫人掌王宮之縫線之事以役女御以縫王及后之衣服喪縫棺飾焉馬衣翼柳之材掌凡內之縫事

役女御謂二奄役使女御縫線本女事喪宮中大小

喪縫棺飾謂殯啓將葬縫棺上帷荒卽今棺罩見喪
大記鄭註焉古本作馬馬以駕遣車縫裯被爲飾喪
車曰柳柳旁障以方扇曰髮材以木爲骨縫彩衣于
上柳言西字從卯詩云維參與昴西方之宿日入之
鄉焉昧谷因以名喪車鄭云古尚書昧谷作柳谷柳
言聚也日入多彩色故聚飾曰柳

染人下士二人府二人史二人徒二十人

染帛爲五色

染人掌染絲帛凡染春暴卜練夏纁玄秋染夏冬獻功
掌凡染事

染不言布天子衣帛也春日暄和宜曬洗絲帛待染
夏日用丹朱染纁纁赤色應火氣也纁入黑成玄秋
氣清爽乃大染五采曰夏禹貢羽畎夏狄翟羽五采
也冬獻功染功成獻也

追堆師下士二人府一人史二人工二人徒四人

追冠名夏冠曰牟追一作毋追撮小之狀故婦入冠
以名卽今髻髻追敦通雕刻也攻金之名副筭用金
玉詩云追琢其章金玉其相

追師掌王后之首服爲副編次追衡筭爲九嬪及外內
命婦之首服以待祭祀賓客喪紀共筭經亦如之

首服上首服副非一之名凡物湊成皆曰副婦人首飾金玉珠翠攢簇故名鄭謂副言覆恐非編編緝亦金玉而簡于副次謂比次稀疎又簡于編追女冠通稱卽今假髮加于頂以受笄者也衡橫同長簪橫貫副上凡簪可通稱笄貴者用玉賤者用骨角以管追著髮也凡追用笄故女子加冠皆曰笄九嬪教九御者女宮之長外內命婦謂卿大夫妻冠服皆資于內以齊其制也喪紀之笄竹木爲之經喪服首經按鄭因春官六冕以王后六服分配五等君夫人及內外命婦雖無明証猶似其以六服分配副編次衡

月衣 卷二
筭云三翟衣皆副。鞠展衣皆緇緣衣。次惟副有衡。編
次皆筭。卿大夫妻皆不得用衡。衡與筭有縱橫大小
而稱筭同。詩云副筭六珈。是副亦用筭。卽衡也。謂庶
人妻無衡猶可。謂卿大夫命婦筭而不衡。何據。又云
外內命服。非佐王后。於其家行禮皆降。引少牢主婦
髮鬋。特性主婦繼筭爲証。然何知髮鬋卽次降于編。
繼筭非次降于次乎。皆猜說。大抵禮書多後人摸擬。
採輯。鄭又採輯摸擬之所以多爲說而愈紛。強附而
愈不合。讀者愛羊存焉可也。

屨人下士二人。府一人。史一人。工八人。徒四人。

掌爲王及后以下屨

屨人掌王及后之服屨爲赤舄黑舄赤纁黃纁青句効素屨葛屨辨外內命夫命婦之命屨功屨散屨凡四時之祭祀以宜服之

服屨禮服之屨複底曰舄禪底曰屨舄亦屨也周人禮服多用赤黑舄色專用之或王用赤舄象陽后用黑舄象陰與纁牙底接處以小絛綴其際爲飾王赤舄赤纁純象陽也后黑舄黃纁雜象陰也句約通拘也以絛著舄頭爲鼻拘束行屨也王與后舄約用青象東方帝出之生氣也青黃赤黑四者四方之正色

故王與后吉屨用之白不用近凶周所勝色也素屨燕居單下之屨無繒句文采之飾葛屨當暑王后皆用命屨命服之屨亦赤黑二色青黃繒約功屨貴人之屨文飾而攻緻散屨賤者之屨四時以宜服如士冠禮夏葛冬皮也

按本文義理不過如右所解而已鄭牽強附合謂王吉服九舄三赤白黑后吉服六舄三玄青赤舄飾南北相對如繒之次屨飾西北相比如繡之次無端穿鑿卽其言可采亦鄭氏一家之禮與本文無涉

夏采下士四人史一人徒四人

夏采大采禹貢徐州羽畎夏翟雉羽五色曰夏旌旂之綏與王后車服皆用之是職主招魂繫天官末者人死魂升天故復向西北乾方萬事有終天之道也○按復事近迂濶專設一官當省

夏采掌大喪以冕服復于大祖以乘車建綏復于四郊大喪王喪冕服王六冕之服復人初死氣絕持死者衣升屋西北面呼其名招使返也復必于死者生平有事之處廟與郊嘗奉祀鬼神所聚也大祖始祖廟七廟皆復大廟則夏采主之乘車王所乘郊祀玉輅綏綏同詩云淑旂綏章以旄牛尾注竿首建于車上

其狀綏然建綏不用旒變也

若天官之屬六十有三卿一人大夫十四人上士三十八人中士一百一十八人下士一百六十九人府七十五人史一百四十一人胥一百六十六人賈二十八人工二十人徒二千一百二十人奄二十七人女二百一十七人女奚六百五十二人閭二十人寺五人內豎十人以上通計三千八百二十一人外九嬪無數世婦無數女御無數

周禮完解卷二終